



16. august 2024

UKA 2024/123

Matumuuna Inatsisartut maleruagassaanni § 33 malillugu isummerfigisassatut aalajangigassaaq una siunnersuutigineqarpoq:

Pineqaatissinneqarsimasut tarnimikkut nappaatillit paaqqutarineqartarnerat katsorsarneqartarnerallu pitsaanerpaaffissaminniitinniarlugit aningaasatigut, allaffissornikkut peqqinnissakkullu sulisunik nukissanillu qanoq qularnaarisinnaanitta misissorneqarnissaa siunertaralugu nassuiaasioqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut. Nassuiaat UKA 2025 nallertinnagu Inatsisartunut agguanneqassaaq.

(Inatsisartunut ilaasortaq Anna Wangenheim, Demokraatit)

Tunngavilersuut

Kalaallit Nunaanni pineqaatissinneqarsimasut tarnimikkut nappaatillit maannakkorpiaq unammillernartumiinnerat ilungersunarpoq erngerlunilu iliuuseqarfigineqartariaqarluni. Pineqaatissinneqarsimasut tarnimikkut napparsimasut oqartussani uteqattaartinneqakkajuttarput Kalaallit Nunaata Danmarkillu akornanni annaaneqariaannaasarlutik. Naatsorsuutaavoq napparsimasut taakku, siunissami amerlissasut taamaattumillu nukinnik amerlanerusunik pisariaqartitsinerat annertusissalluni.¹

Maannakkut unamminartut ilaatigut ukuupput maani nunatsinni pineqaatissinneqarsimasut tarnimikkut napparsimasut ataavartumik ilusilersorluakkamillu passunneqarnissaannut pilersaaruteqartanngimmata, taassumalu kingunerisarlugi, Kalaallit Nunaata Danmarkillu akornanni uteqattaartinneqartarnerat passunneqarnissaminnut pilersaaruserneqarsimanatik. Ilungersunaannartumik aningaasatigut aammalu sulisunik immikkut ittumik ilinniagaqarsimasunik piginnaaneqarluartunillu amigateqartoqarpoq, tarnimikkut nappaatilinnik pineqaatissinneqarsimasunik passussinnaasunik. Taamatut inissisimanerup naammangitsumik passussinermik tapersersorneqannginnermillu kinguneqartitsivoq.

Maannakkut taakku napparsimasut Kalaallit Nunaanni allatuulli tarnikkut napparsimasunut immikkoortortaqarfimmiit sullinneqartarput, nalinginnarmik tarnikkut peqqissuunissamik passussinissamik neqerooruteqarnermik suliaqartunit, taamaattumillu pineqaatissinneqarsimasut tarnikkut napparsimasunut immikkut ilisimasalittut sulisussatut immikkoortortaaani. Taamaattumik pisariaqartinneqarpoq, ilisimasanik aammalu piginnaasanik inerisaanissaq, aammalu sulisulersornissaq taakku napparsimasut pisariaqartitaannik naammattumik sulisinnaasunik, pingaartumik aamma tarnikkut napparsimasunut illorsuassaaq nutaamut atatillugu ukiumininnguit qaangiuppata atulersussatut, napparsimasut passutassat amerlinissaannut naatsorsuuteqartoqarmat.

Napparsimasut pineqaatissinneqarsimasut pisinnaatitaaffiinnut tunngatillugu tamakkiisumik ataqqineqanngillat, sullinneqarsinnaanerat killeqarmat, taamaaliornerullu kingunerisinnaallugu passussineq amigartooq pisariaqartitaagalullu naammassineqannginnerat.

Siunnersuutip siunertaraa misissussallugu, qanoq uagut maani nunatsinni toraagalimmik suliniarnitsigut aningaasatigut, allaffissornikkut peqqissutsikkullu nukiit pisariaqartinneqartut pineqaatissinneqarsimasut

¹ Psykiatri i Grønland - Primære udfordringer og bud på løsninger - VIVE, juli 2024



tarnimikkut nappaatilinnut qulakkeersinnanorigut.

Pineqaatissinneqarsimasut tarnikkut napparsimasunut tunngavissaqarluarpoq ataqatigiissumik eqaatsumillu passunneqarnissaminnut pilersaarusiunneqarnissaat Kalaallit Nunaanniippata imaluunniit Danmarkimiippata apeqqutaatinnagu. Killormut inuiaqatigiit innuttaasullu maani nunatsinni paasinartumik naatsorsuutigaat, pineqaatissinneqarsimasut tarnikkut napparsimasut eqqortumik passunneqartut taamaammallu pinerloqqittooriataarnissaannik annikillisaataasumik.

Tamanna tunngavigalugu neriutigaarput, Naalakkersuisut Inatsisartunilu partiit sinnerisa siunnersuut taperserumaaraat.

Pisortanut aningaasatigut allaffissornikkullu kingunissai

Nassuiaatip suliarineqarnerani aningaasartuuteqassaaq. Taakku atorfilittap ukiumut akissarsiaasa 500.000 koruunit qaangerneqarnissaat naatsorsuutigineqanngilaq.

Namminersorlutik inuussutissarsiutilinnut aningaasatigut allaffissornikkullu kingunissai

Soqanngilaq.

Innuttaasunut aningaasatigut allaffissornikkullu kingunissai

Soqanngilaq.